

DISSERTATIO INAUGURALIS MEDICA,  
DE  
**NITIO MENSIIUM**  
**FINE MORBORUM,**

QUAM AUSPICE DEO PROPITIO

*Et Consensu atque Auctoritate Gratiſſe Facultatis Medicæ*  
IN ALMA REGIA FRIDERICIANA,

P R Æ S I D E

**N. D. MICHAELE ALBERTI,**

CR. MAJ. REG. BORUSS. AULICO ET CONSIST. MAGDEB. CONSILIARIO,  
MED. ET PHILOS. NATUR. PROFESSORE PUBL. ORDIN. ACAD. NAT. CUR.

COLLEGA, SOCIET. REG. BORUSS. SCIENT. SODALI, ETC.

*Domino Patrono, Præceptore ac Promotore suo, omni honoris cultu proſequendo,*

**PRO GRADU DOCTORIS**

*ſiſque in Medicina Honoribus & Privilegiis Doctoralibus legitime impetrandis,*

HORIS LOCOQUE CONSVETIS, ANNO MDCCXXVII. D. DECEMBR.

PUBLICAE ERUDITORUM VENTILATIONI SUBJICIET

AUCTOR ET DEFENDENS

**JOHANN ADAM HARTMANN BREBISIUS,**

MÜNCHBERGA - BARUTHINUS.







V I R O

EXCELLENTISSIMO, EXPERIENTISSIMO,  
NEC NON AMPLISSIMO DOMINO,

D O M I N O

D. JOH. ERHARDO  
DONAUERO,

MONACHO - MONTANORUM POLYATRO AC  
PHYSICO PROVINCIALI MERITISSIMO,

PATRONO ET PRÆCEPTORE SUO  
ÆTATEM USQUE DEVENERANDO

HANC DISSERTATIONEM

DEDICAT, ET CONSECRAT

A U C T O R.

# V I R

EXCELLENTISSIME, EXPERIEN-  
TISSIME DOCTISSIMEQUE  
PATRONE COLENDISSIME.

**L**icet ita, VIR EXCELLENTISSIME! in exerci-  
tatione dicendi, & scribendi versatus essem,  
ut nihil supra esse posset, & in me tam singularis  
vocis esset commendatio, ut oratio ex ore meo mel-  
le fluere dulcior: eximia tamen ista merita, quæ ex mi-  
rifico incredibilis TUÆ erga me Benevolentia, fonte,  
largiter in me promanarunt, satis digne explicare, & ita,  
ut par est, deprædicare non valerem. Nam si admirabi-  
lem tantorum a TE in me collatorum Beneficiorum a-  
pud animum propono multitudinem, & accuratiori men-  
tis lance eam perpendo, statim nullam plane linguam sa-  
tis disertam, & ad enarranda, & ad extollenda tanta me-  
rita satis idoneam esse video. Si quid enim est in me  
ingenii, quamvis sit exiguum, aut si qua experientia  
Doctrinæ Medicæ, cui me, usque ad hoc tempus, ope-  
ram navasse, non inficior: ista omnia a TE profecta esse,  
non possum non, quin ingenue confitear. Eximias  
igitur



igitur grates TIBI referre opus me habere existimo, propterea, quod TE in excolendo animum meum tam humanitate, quam studiis, ita fidelem, & integrum præstitisti Doctorem, ut jam ex eruditissima tua institutione non mediocrem, sed incredibilem quandam sentiam utilitatem: TU excitasti animum meum ad studia, ut illa felici progressu in Academia Fridericiana, ingeniis doctissimis, & eruditissimis hominibus affluenti, prosequi potuerim, & quid plura? TU Dux, & Autor mihi Parente orbato ad omnem meam felicitatem promovendam extitisti, TU januam mihi ad illam aperuisti, ut faciliore labore ad istam nunc pervenire possim. O! quam jucunda istius est temporis recordatio, quo mihi ab ore tuo nil nisi Verba eruditione redundantia proferenti pendere licuit, non possum satis exprimere verbis, quanto animus meus afficiatur gaudio, si istud jucundissimum tempus in memoriam revocare soleo. Nam cui non hoc singularem afferat lætitiā? & quis non ex hoc mirificam capiat voluptatem, cum quis tam excellenti quasi privilegio gaudeat, ut possit quotidie Virum Summum, summo ingenio, & præstantissimo Judicio præditum, qualis TU es, VIR EXCELLENTISSIME! convenire, & Doctrina istius frui dexterrima. Cum itaque tam insignem TUorum erga me Meritorum esse magnitudinem, constat, ut non ista modo nunquam remunerare, sed ne pro istis quidem dignas referre gratias valeam: hanc idcirco dissertationem, ut aliquod tantummodo studii, officiorum, & animi mei in TE argumentum, & documentum ederem, Celebris TUO Nomini dedicavi consecravi. Quamvis autem hanc Dissertationem levem, & non satis dignam Summorum, & eruditorum Virorum personis esse judicem: tamen abs TE submissio petere studio non erubesco, ut illam non tanquam Specimen aliquod eruditionis solenne, sed ut exiguum  
sincerum,

sinceri, & non fucati mei erga TE Amoris Testimonium agnoscas, & lubenti accipias animo, & si quid forsitan quod ab omni eruditione remotum TIBI meas Theses legenti, ob oculos veniat, ingenio meo rudi, pro TUA admirabili humanitate, qua me hætenus amplexus es, veniam dare, velim non recuses. Quod si feceris; me TIBI semper devinctum, & arctissime obstrictum habebis, & si quid est in me officii, quod tibi præstare possim ad id omni tempore TIBI adero paratissimus. Quod vero superest, pro tot tantisque quibus me hætenus affecisti, meritis, magnas ex intima cordis abyssu, ago, habeoque gratias, ista nulla unquam oblivio, nulla ætas, ex animo delebit meo, sed memoriæ semper inhærebunt fixa, & quasi marmori manebunt incisa: Nunquam etiam Summum & Omnipotens Numen ardentibus efflagitare precibus desistam, ut non TE modo unacum Splendida TUA Familia semper Salvum incolumemque conservare; sed præstantissima etiam, & gravissima TUA negotia secundare, & benedictione sua promovere velit: tandem vero ut clarissima laudis TUÆ Fama, quæ jam magnum ascendit fastigium, perpetuo floreat vigeat virescat ex intimo corde precor. Vale & Fave.

## EXCELLENTISSIMI NOMINIS TUI

*cultori obsequiosissimo*

J. A. H. BREBISIO.





## PROOEMIUM.



**S**I quid unquam potest inveniri, quod inæstimabili corporis humani quam maxime inservit salutis, profecto ipsa est Natura, siquidem luce clarius apparet meridiana; quod ista non eam solum materiam, quæ conservationi corporis singulariter conducit & valetudinem mirifice promovet, libenter recipere & fovere soleat, sed quod omne

etiam objectum corpori suo vel molestias afferens, vel plane tristem interitum minitans, tantis, quantis potest expellere contendat viribus. Hanc igitur incredibilem quantam Naturæ esse virtutem, ut ista, quæ integræ hominis salutis nocent, sedulo removeat & quasi evomat, quilibet, in quo aliquid tantummodo residet ingenii mecum ingenue confiteri non erubescet. Nonne enim hæc admirabilis & præstantissima quædam est virtus? quam in vomitu, ex nimia aut ciborum, aut potulentorum ingestione existenti præstat, & ostendit: quod si non faceret, quantum inde veniret damni, & quam pestifer inde oriretur morbus, sufficientibus non potest exprimi verbis;

Quemadmodum igitur omne  
A 2 istud



istud, ex cujus nimia abundantia varia morborum genera profluere solent, removet : ita etiam sæpenumero, ne nimia sanguinis copia membra sic obruantur, ut inde multas sentiant molestias, multaque experiantur incommoda, hæmorrhagiam, quæ facit, ut sanguis superfluus abducatur, instituit. Quod si enim sanguinem accuratiori consideremus mente, & ejus principia constitutiva paulo exactius perpendamus, statim videmus, istum vi combinationis suæ commode posse efficere, ut corpus non multis solum & variis gravissimis implicetur morbis, & acerbis defatigetur cruciatibus, sed etiam ut omnes ejus vires debilitentur, & plane destruantur; siquidem neminem Medicorum fugit, quod sanguis ex triplicibus & aliquibus contrariis constet principiis, quæ ad firmam inter se connexionem servandam plane inepta existunt. Compositus enim sanguis in se continet, aquam, Lympham, & Sanguinem stricte ita vocatum, qui seorsim consideratus terreo-oleoso-aqueam substantiam nobis ob oculos ponit : notum autem est, quod hi humores difficillime commisceri possint, & quod conceptam schesin, nisi perpetuo circumagitantur motu, iterum admittant. Sicuti enim omnes oleaginosæ, vel pingues substantiæ cum aqueis, non facili labore, sed sedula & frequentissima agitatione quadantenus coniuntur : ita res etiam sese habet cum ambobus, de quibus jam mentio facta est, humoribus, nimirum cum humore aqueo, & lymphâ tanquam liquore oleoso-pingui. Quapropter Naturam, quæ præses quasi est corporis nostri, maxime opus habere existimo, ut in conservando & promovendo motu sanguinis circulatorio strenue laboret, ne supra recensiti humores in tota sanguineæ crasis massa turbas excitent tristissimas, & ne damnosam contrahant confusione, quæ partes corporis solidas ad subeundam ulcerosam vel putredinoso-sphacelosam corruptionem facile posset disponere. Nam si massa humorum, præcipue vero sanguinis in corpore nostro sive ex lauta diætâ, sive ex neglectu hæmorrhagiarum tam naturalium quam artificialium, sive ex alia causa ita superflue adaucta est, ut abundet, tunc luculenter nobis conspiciere licet, istam abundan-  
tiam.



tiam, uti omne nimum vertitur in vitium, Naturæ plus damni, quam salutis afferre, & eam in motu rite administrando circulatorio quam maxime impedire, dum nimirum aucta mole sua vires corporis vehementer aggravat, & ita supprimit, ut omni plane destituantur vigore, quo tandem fit, ut non sanguis modo in partibus poroso-cibroso-carneis, sed & in minimis restagnet vasculis, secessus efformet, spissitudinem inducat densissimam, & nisi rebus sic se habentibus per debita auxilia adferatur cito medela, infarctus, & obstructions se se exerunt, & demum ipsa existit stasis, quæ innumera corpori parit detrimenta. Quapropter istam admirabilem Naturæ virtutem, quam in imminuenda massæ sanguineæ exuperantia per hæmorrhagiarum administrationem præstat, satis digna non posse extolli laude arbitror. Superfluum enim sanguinem acerbissimorum matrem quasi & genetricem esse morborum, non possum non aperte confiteri. Falsam idcirco Helmontii sententiam, qui sanguinem sensu excellentiori thesaurum vitæ putat, maxime reprehendendam, & plane rejiciendam esse censeo: quia sane nubila est, & firmo rationis lumine caret: quod si enim hoc assertum integræ consentiret veritati, sequeretur inde, ut per majorem sanguinis copiam inestimabilis hominis sanitas multo commodius conservaretur, & vita per longius temporis spatium protraheretur. Cum autem experientiam contrarium testari videmus, merito ab hac sententia, nulla solida ratione suffulta discedendum arbitror, & optimum & saluberrimum consilium esse puto, ut ipsum Naturæ ductum sequamur, qui statim ab ineunte ætate abundanti sanguinis copia corpus liberare hominis præcipit, ne inde multi, & varii molesti proveniant morbi, qui vires & artus tam vehementer excruciant, & debilitant, ut sæpius nullam pristinæ recuperandæ salutis spem reliquam esse, videatur. Quam ob causam in prima statim pueritia Natura nobis singularem & admirabilem hæmorrhagiarum ordinem ostendit: primo nimirum hæmorrhagiam producit narium, cujus quidem multæ afferri possent rationes, hac autem unica tantum, quia festinatio prohibet, contenti esse volumus. Nam



isto tempore infantes non modo ab intra varias ediscendo & imi-  
 tando labores atque lectiones caput vehementer ita exagitant, ut  
 insignis in illo humorum existat affluxus, sed ut etiam ab extra  
 multis læsionibus, sicuti contusionibus, collisionibus &c. haud in-  
 frequenter affligatur, & quod superest, sæpenumero videmus, quod  
 infantes non raro denudatum, & liberæ solis irradiationi exposi-  
 tum gerant caput, fieri aliter hac re non posse existimo, quam, ut  
 Natura sanguinem circa hanc partem collectum, cum imprimis  
 illam hoc ætatis termino in moraliibus cum capite singulari habere  
 commercium, constet, per nares excernat. Dum autem pueruli  
 temporis progressu quoad partes inferiores magis magisque firmi &  
 robusti redduntur, tunc istos a supra indicatis injuriis liberari,  
 patet, & dum caput, memoriæque ediscendo diutius exercere ab-  
 stinent, hæmorrhagias caput deferentes ad inferiores corporis re-  
 giones descendere, & imprimis pectus aggredi, neminem Medico-  
 rum esse posse arbitror, quem fugiat, licet quidem non inficias  
 ire possim, hæmorrhagiam narium frequenter non ex pueritia  
 solum & adoleſcentia in juventutem, sed in postera etiam anno-  
 rum septenaria transferri. Quod si vero juvenili ætate sangui-  
 nis e pectore eructationem producat, & gignat Natura, tunc il-  
 lam sanguinis excretionem a Medicis hæmoptysin nuncupari,  
 constat, cujus nexum causalem una cum ætiologia vomitus, ac mi-  
 ctus cruenti, sudoris sanguinei, &c., quoniam hæc omnia ad susce-  
 ptarum hæmorrhagiarum censum pertinent, merito silentio præ-  
 tereundum esse censeo, & de iis saltem mentionem faciendam  
 esse puto, quæ tam ratione temporis invasionis, & recursus, quam  
 ratione loci, ex quo contingunt, utiles dici possunt: ut sunt fluxus  
 hæmorrhoidum ac mensium legitimus. Quapropter me ad alte-  
 ram salubrium hæmorrhagiarum speciem, postquam de priori na-  
 rium nempe hæmorrhagia verba quædam feci, converto, nempe  
 ad legitimum hæmorrhoidum fluxum, qui eo tempore communi-  
 ter se se exerit, quo viri in procreandæ sobolis negotio maxime  
 sunt occupati, hinc anno quadragesimo iste fluxus ut plurimum  
 conspici licet, quo ætatis termino quoque vecturæ & equitationes  
 ad



ad hunc excitandum affectum haud raro dant ansam. Durat vero hic sanguinolentus fluxus nisi aliis intercipiatur, & impediatur irregularitatibus, frequenter satis per reliqua annorum lustra, usque ad seram senectutem, cum euphoria illorum, qui hos affectus sentiunt. Tandem vero ad notabilem hæmorrhagiam sequiori sexui solummodo propriam, ad menstruum nempe ex genitalibus sanguinis profluxum venio, istum homines sceminini sexus eo præsertim experiuntur tempore, quo viri potentes, & ad generationis habiles evadunt negotium. Hinc initium suum ordinarie fluxus iste sortiri solet ineunte pubertatis ætate, anno nimirum decimo quarto, a quo usque ad quinquagesimum perdurat annum, & singulis mensibus ita suos efformat & producit recursus, ut per trium septimanarum spatium cesset, quarta vero septimana fluere & manare rursus incipiat: rationem autem, cur sanguineus ille e genitalibus mulierum fluxus menstruum fervet periodum, quia tempori parcere opus habemus, silentioque præterimus, & benevolo Lectori *Celeberrimi Dn. D. Stablii dissertationem, quam de fluxu mensium secundum & præter naturam succedente, habuit, maxime commendamus.* Nos tamen interim de eximiiis congruarum hæmorrhagiarum utilitatibus, quas profecto singularis esse momenti, censemus, quædam adjungere volumus. Non congruæ enim hæmorrhagiæ solum a plurimis ex plethora tanquam ex multorum malorum fonte profluentibus periculis corpus tuentur nostrum, & istud per longum temporis spatium saluum & incolume servant; sed & illud, si ab aliquibus aliorum malorum occupatur speciebus, rursus ab iis liberant, & in pristinos euphorie reducunt cancellos. Sicuti Natura enim, si artificiali modo superflua sanguinis copia subtrahatur, non parum levaminis in administranda œconomia sentit vitali; ita etiam illi per spontaneas, & ab intra succedentes congruas hæmorrhagias multum affertur commodi, & salutis, quoniam istæ cum prioribus unum eundemque respiciunt finem. E contrario autem, si per congruas hæmorrhagias, tam artificiales, quam spontaneas non tam salubriter



briter corporis salutem consuleretur, profecto multi periculosi, uti ex Medica praxi constat, existerent morbi, ut sunt dolores capitis tensorii, pressorii, pulsatiles, æstuentes, pungentes, & vertiginosæ ejusdem perturbationes, itemque ophtalmiæ, otalgia, odontalgia, coryzæ, phlegmatorrhagiæ, gravedines, partium glandulosarum inflationes, nec non pectoris oppletoria incommoda, asthmatica, spastica, pleuritica, peripnevmoniaca, cordis palpitatoria, & quæ sunt alia, præterea etiam vicinarum partium ægritudines, præsertim ventriculi cardialgica, interdum etiam vomibunda pathemata, ut & hypochondriaci ac hysterici, torminosi, colici, tenes modici, splenetici, hepatici, nephritici affectus, porro externarum partium lassitudines, gravativæ sensationes, itemque spasticæ tractiones, ut arthriticæ, podagricæ, ischiadicæ afflictiones, convulsiones, febres ac inflammationes &c., a quibus recensitis malis omnibus hæmorrhagiæ corpus nostrum saluum tutumque conservare valent. Ne autem quæstionem quis movere opus habeat: num indistincte quævis hæmorrhagia istos, quorum mentionem fecimus, auferat, & suffocet morbos, an non? Sequenti responsione nostram explanamus sententiam, dicendo: quod quædam hæmorrhagiæ speciales quarundam corporis partium morbos tollant, & sanent, quædam vero plura morborum genera, quibus universum corpus obnoxium est, depellant. Ad priorum classem merito hæmorrhagia refertur narium, quæ præsertim capiti, si dolore ex nimio sanguinis confluxu existenti excrucietur, singulariter prorruptione sua prodest, & angorem mirifice imminuit, id quod etiam propria istorum hominum, qui ejusmodi gravissimis affliguntur, & exagitantur incommodis, attestatur confessio, cum ardentissime hæmorrhagiæ narium prorruptionem optant, & anxie efflagitant, dicentes: *Wenn sie nur aus der Nasen bluten könnten, so würde ihnen der Kopf viel leichter werden.* Ex quibus satis superque patet, hæmorrhagiam narium doloris capitis saluberrimum esse remedium, ut & huc pertinet hæmoptysis, vomitus cruentus, ac mictus cruentus, hæ licet hæmorrhagiæ ratione incongruorum locorum, per quæ erumpunt, maxime



xime sint periculosa; aliquando tamen extra ordinem, salubritatem corpori hominum conciliant, & morbosa quaedam pathemata solvunt. Nequaquam autem de his hæmorrhagiis sentiendum, ac si utilitates earum annotatis solummodo propriæ essent partibus, siquidem multiplex testatur experientia, quod illæ istos non modo, qui remotas corporis partes, sed istos etiam, qui totum excruciant, & graviter affligunt corpus, aliquando auferant morbos, id quod evidenter ex hæmorrhagia videmus narium, quæ sæpius præter capitis afflictiones, & pectoris ac pulmonum pleuritica, peripneumoniaca, & asthmatica incommoda, item febres præcipue sanguineas, &c. curat. Tandem ad istam salubritatem, quam proruptio fluxus hæmorrhoidalis parit, me converto. Hunc idcirco sanguinolentum fluxum ad antecedentium hæmorrhagarum numerum minime referendum esse, censeo, propterea, quod non minus quarundam partium corporis tollit morbos, quam totius corporis incommoda imminuit, & suppressit: quapropter istum nobili illarum hæmorrhagarum, ex quibus totius corporis partes salutem haurire solent, merito accensendum esse numero arbitror. Res enim per se clara, & nota est, quod ille præter hæc in vena portæ se se exerentia pathemata tam partium inferiorum horrendos, ut ischiadicos, gonagricos, podagricos, rheumaticos, oedematosos, varicosos affectus, quam etiam superiorum, ut capitis, pectoris, extremitatum congestorias, inflammatorias, rheumaticas, serosas, spasticas molestias, nec non externum habitum corporis defœdantes & affligentes cacochymicos, cachecticos epilepticos morbos, non minus etiam febres quasdam, ut & nonnullos animi affectus, v.g. maniacos, melancholicos &c. extinguat & depellat, & longævitatē hominibus conciliet, id quod etiam *Dn. D. Præses* optime & erudite demonstravit in *Tractatu de Hemorrhoidibus* P. I. p. 99, it. p. 147. §. XXVII. & p. 400. §. XXIV. p. 412. §. XXXVIII. Admirabilem autem hæmorrhoidum fluxus salubritatem singularis menstrui fluxus longe superat præstantia, quæ miseris fœmellis morbos secundum Hippocratem propter



uterum bis patientibus præcipuo esse solet solatio: quapropter etiam, si ante ejus prorruptionis terminum maximis affliguntur corporis torminibus, omnem in eo fluxu spem ponunt, fore, ut per istum ab istis acerbis liberentur cruciatibus, id quod etiam propria illarum verba, quæ sub anxia primordialis eruptionis fluxus illius expectatione eloqui solent, satis attestantur, hoc quod veritati sit consentaneum ipsa experientia tanquam rerum magistra, nobis abunde demonstrat. Hinc rem omnibus modis absolutam & veram esse, quis est, qui neget? quod initio mensium non multæ modo præoccupentur, sed etiam ætate præsentis foëminarum afflictiones curentur, ut sic initium mensium non immerito dici possit finis præviorum morborum. Quapropter dissertationem, speciminis inauguralis loco, de utilitate initii mensium, quoniam hanc non satis hætenus explicatam esse sentio, conscribere conatus sum, & quædam de *initio Mensium, sine morborum* differere non dubitavi. In hac tractatione autem sequentem servavi ordinem: ut primo generalis initii Mensium usus demonstrem, hisque speciales adjungam; denique etiam ostendam quomodo therapeutica methodo illa obstacula, quæ huic remoram ponunt, & sæpius efficiunt, quominus ista Mensium hæmorrhagia præscripto a Natura termino legitimum nancisatur successum, commode possint removeri. Quod autem superest, *summum & omnipotentem DEum*, qui mihi Medicinæ Studiis hætenus operam navanti benedictione adfuit sua, ardentibus efflagito precibus, ut etiam hos meos conatus gratia secundare velit cœlesti.

## §. I.

**S**I quid est, quod valetudini foëminarum mirifice conducit, & istarum corpus a variorum molestia morborum liberat, profecto istud saluberrimum Mensium esse initium, existimo: hoc quod veritati sit conveniens, non hodie solum Medici sum-



ma experientia & excellenti præditi doctrina ingenue fatentur; sed jam jam antiquis etiam temporibus Medicos laude eruditionis præstantissimos illud, quod scilicet initium Mensium finis sit præviorum morborum, cognitum perspectumque habuisse, ex *Hippocratis* verbis, quæ in ejus *V. aphor. 57.* inveniuntur, satis abundeque colligere licet. Dixit enim senex *l. c.* *Si menstrua non fiant, ex utero morbi contingunt*, quibus indicare voluit, primordium etiam *αρχαίνας* ad sanitatem foeminarum integram salvamque conservandam & ad morbos a debili istarum corpore arcendos maxime idoneum & proficuum esse.

### §. II.

Id ipsum quoque experientia innumeris firmis rationibus, & medicis observationibus munita confirmat, & ad hæc dilucide commonstrat: quod primordialis mensium eruptio præter istam, de qua jam supra mentio facta, salubritatem, quam in corroboranda valetudine & in tuenda ab ingruentibus morbis sanitate præstat, alia adhuc excellentiori gaudeat utilitate, quam in removendo, ac sanando morbos actu præsentis & corpus puellarum graviter excruciantes sufficienter nobis ostendit.

### §. III.

Quapropter ratione atque experientia fretus utilem initii Mensium effectum illum, quem in plenaria innumerabilium morbosorum pathematum extinctione exhibet, in præsentī dissertatione paulo exactius perpendere & in eadem *de initio Mensium, tanquam sine plurimorum morborum* quædam proponere non dubitavi. Ne quis autem sibi persuadeat, me de quovis Mensium initio hæc in medium protulisse, placuit, statim differentiam illius rei præmittere, quo inde diversus etiam effectus eo melius, eoque facilius elucescere possit.



§. IV.

Est itaque initium Mensium vel regulare, vel irregulare, vel salubre, vel morbosum.

§. V.

Sub priori intelligitur primordium Mensium, quod statim atque ordinato ætatis termino, quo puellæ viri potentes, & ad difficile generationis negotium subeundum & perferendum idoneæ existunt, in conspectum prodire solet. Istud enim fieri annotamus sub fine secundi, aut initio tertii septenarii, anno nimirum 13. 14. 15. quod autem alterum, irregulare scilicet, attinet, istud ordinatum & moderatum eruptionis terminum servat neutiquam, sed, vel citius, vel tardius prorumpit, prætereaque vel excessive, vel insufficienter, vel per extraordinaria sæpius loca succedit, ex quibus anomalicis successibus sole clarius apparet, quod ad classem irregularitatis pertineat.

§. VI.

Cum priori, nempe regulari, singulariter conspirat salubre Mensium initium, quod non modo debito tempore prorumpere incipit; sed etiam tacite, placide, ac sufficienter succedit, atque decurrit, istaque incommoda, quæ præcessa ex plethora, tanquam innumerorum malorum fonte promanarunt & suborta sunt, imminuit, & aufert, nec non reliquo tandem ordinato suo recursum tantum foeminis affert emolumentum, ut per maximum vitæ spatium salva valetudinis frui possint prosperitate. E contrario autem morbosas mensium primitias cum irregulari Mensium initio magna ex parte convenire constat. Consistunt vero istæ præcipue in anomalico, ac irregulari accessu, successu, ac decursu Mensium, quibus omnibus multæ foemellæ contrahuntur molestiæ, multique conciliantur cruciatus.

§. VII.



§. VII.

Hæ sunt itaque diversæ initii Mensium species, secundum quas etiam discrepat ejusdem effectus. Hinc, si in præsentî tractatione de salubri primordii Mensium effectû sermo occurrit, non quamvis Mensium primam eruptionem ad illum effectum obtinendum idoneam, me putare, velim existimetis; sed ad illum assequendum adæquatam causam (qualis est salubre Mensium initium, de quo in superioribus dictum) necessariam esse, quilibet facile judicare poterit.

§. VIII.

Interea tamen negandum non esse arbitror, quod aliquando ex tali Mensium initio, de quo non modo nil utilitatis, sed potius multum detrimenti speratur, (quoniam istud a recto salubris primordii Mensium tramite ut plurimum remotum esse patet) notabilis emergat salubritas: uti hoc ex serotino Mensium initio videre licet, quod non raro gravissima præcedant morbo-  
sa incommoda, quæ ad plenariam usque eruptionem perdurant: quando vero illam actualiter cum insequenti, legitimo, sufficienti, ac ordinato successu, atque recessu nanciscitur, plurimos præviorum morborum aufert, eorundemque recursum præscindit.

§. IX.

Hanc igitur ob causam in hac tractatione præter salubris primordii Mensium utiles effectus, illas quoque utilitates, quæ a serotina Mensium prima eruptione provenire solent, insimul annotabo, easdemque tam firmis rationibus, quam veris medicis observationibus corroborationibus.

§. X.

Prius autem, quam ad propositum meum progrediar, quædam adhuc breviter circa rubricam hujus dissertationis monere, necessum puto, ne contrarius ex ea-



dem elici possit sensus. Pro mea enim tenuitate promisi quædam *de initio Mensium sine morborum* differere & in lucem conspectumque proferre. Cum vero initium Mensium nequaquam omnium, quamvis multum secum ferat salubritatis, præviorum in quovis subjecto morborum, ob contrariam experientiam, finem dici posse, arbitror: hinc in rubrica initii Mensium allegatum prædicatum minime generice, ac universaliter esse accipiendum, indicare volui; siquidem neminem practicorum fugit, quod in diversis subjectis morbi quidam, qui ante primam Mensium eruptionem jam jam adfuerunt, post legitimum ejus successum, ac decursum molestis suis afflictionibus continuare soleant: ut morbi hæreditarii, item motuum vitia, ex animi pathematibus suborta, &c.

§. XI.

Sicuti enim non omnes cujuscunque generis morbi univocam agnoscunt causam formalem; hinc consequenter non unico sanari & auferri possunt remedio, sed requiritur potius, ut pro speciali discrepantia unuscujusvis causæ morbificæ, diversa quoque adhibeantur remediorum genera: ita res etiam sese habet, cum morbis primitias Mensium ante cedentibus, eorundemque remotione, quæ per Menses legitime initiantes, succedentes, ac decurrentes fieri solet.

§. XII.

Istis ergo, quæ circa hujus dissertationis præliminaria monere necessum duxi, præmissis, ad ipsam admirabilem initii Mensium Salubritatem explanandam, & ad eandem in sequentibus tam in genere, quam in specie considerandam sine ulterioribus verborum ambagibus me accingere non dubitavi.

§. XIII.

Ut autem ordine procedam, mearum esse partium video,



video, ante omnia historicum proponere & explicare conspectum, & in eodem primario exactius pensitare: num incredibilis initii Mensium salubritas omnibus subiectis nullo ad temperamentorum varietatem, & ad reliquam circumstantiarum diversitatem habito respectu sit familiaris, an secus.

§. XIV.

Negandum quidem est neutiquam, utilitatem hanc plurimis sequioris sexus communem esse subiectis; siquidem multa eorum ante primam Mensium eruptionem morbis se implicata esse sentiunt, quibus tandem hac exoptata Mensium proruptione superveniente liberantur: nihilominus tamen quædam horum reliquis in salubritate ista prærogativa antecedunt. Experientia enim & medicæ annotationes fatis & superflue testantur, quod initii Mensium utilitas non in omnibus subiectis universaliter & indiscriminatim, uno eodemque modo & gradu sit observanda, sed quod illa secundum diversitatem temperamenti cujusvis individui diversum etiam producat effectum.

§. XV.

Hinc illis foemellis longe major & frequentior contingit, quæ paulo activiori nec admodum irregulari & tergiversanti gaudentes indole de temperamento participant cholericæ & sanguineæ, in quibus temperamenti non animus solum & vires, præsentibus ad menstruum suscipiendum & exequendum in ejusmodi ægrotatione negotium deprehenduntur; sed ad hunc etiam actum exercendum idonea corporis adest dispositio, quæ tam in partibus solidis, quam fluidis se se ostendit: in fluidis enim singularem habitudinem ad efformandas congestiones, ut per illas hæmorrhagiæ suscitentur uterinæ, a desse constat; in solidis vero notabile fibrarum robur habitare patet, quo congestiones

nes



nes melius & expeditius procedant, & expectatæ vasculorum perruptiones, & humorum in iisdem contentorum actuales effusiones citius promoveantur; e contrario autem in foemellis phlegmaticis & melancholicis temperamentis præditi salubritas initiantium Mensium tanta non est, quantam quidem in supra annotati temperamenti personis deprehendi, deprædicavi. Non enim in his solum omnis excitati animi vigor, ad actum, de quo supra dictum rite suscipiendum, & legitime administrandum, deficit; sed reliqua etiam corporis constitutio ita comparata observatur, ut ad priorem obtinendum scopum plane videatur inepta. Nam in illis, quæ phlegmatico gaudent temperamento, humores ob fluxilitatis nimietatem genuinam sanguinis non admittunt excretionem, ac superflua sua humiditate efficiunt, quo partes fibroso-carneæ debito destituantur tono, & sic ad congestiones allevandas, & actua-lem sanguinis expressionem excitandam inhabiles evadant. In melancholicis vero fluidorum singularis crassities ac spissitudo, & excessiva partium densitas & stric-tura, salubris hujus excretionis initio non mediocre afferunt impedimentum.

§. XVI.

Porro quoque illis præcipue familiaris esse solet subjectis utilitas hæc, quæ mobiliori paulo indulgent vitæ generi: hoc enim non modo tota massa sanguinea in debita conservatur fluiditate; sed etiam de reliquo omnium actionum vitalium, in specie se- & excretoriarum, hinc & menstruæ excretionis hujus initium, successus, ac decursus acceleratur, atque facilitatur. Neque minus illæ initii Mensium præ cæteris salubritati obnoxie sunt foemellæ, quæ dicta utuntur lauta, insimul tamen non nimis crassa, atque spissa; sed potius tenui, ac probe diluta, modice spirituosâ, aromatizata: nam per dietam  
talem



talem, uti omnium hæmorrhagiarum, nullo habito respectu ad loca, successus præritatur; ita & in specie per eandem hæmorrhagia muliebris menstrua non parum incitamenti accipit: præterea illæ quoque initii Mensium salubres effectus non infrequenter experiuntur, quæ res sic dictas non-naturales rite usurpare didicerunt, quod enim aer, cibus & potus, motus, vigiliæ, animi pathemata, excreta (si recte applicentur) circuitum sanguinis adaugendo, eoque ipso massæ sanguineæ fluiditatem ac puritatem conciliando; somnus, quies & retenta &c. corpori necessarias vires restaurando, ac conservando ad citiorem imo feliciorẽ hæmorrhagiarum proventum & decursum multum contribuant, ex subsequenteribus clarius patefcet. Sic v. g. fœminæ aëri temperationi, magis tamen calidiori expositæ viventes, itemque cibo, potu ac motu in superioribus (ubi de diætâ & vitæ genere quædam differui) indicato modo utentes, maxima cum euphoria sentiunt ac perferunt Menses initiantes; pari ratione cum illis res constituta est, quæ vigilias moderate exercitant, quippe quibus corporis aptitudo, animique vigor tam in moralibus quam in vitalibus alacriter administrandis functionibus insigniter prolicitur, ac obfirmatur: idem etiam sentiendum est de iis, quarum animus diversis pathematibus, gaudio, amore, hilaritateque obsessus est: sub tali enim animi constitutione parum auctior exortitur massæ sanguineæ commotio, qua singularem illa nanciscitur fluiditatem; cæteroquin animalia ut & vitalia negotia longe vegetius atque promptius succedunt. Eodem fere respectu & illis sequioris sexus subjectis in hac salubritate præpollentiam adjudico, quæ ordinarias excretiones non admodum negligenter tractant; sed harum potius successum omni studio promovent: rebus namque sic stantibus debita contingit non solum

C

humo-



humorum depuratio, crassarumque substantiarum recta eliminatio ac defecatio, ut hac ratione non modo puriores, fluidiores, & ad actualem excretionem subeundam habiliores evadant; sed etiam ipsum vitale agens heterogeneitates œconomiam vitalem valde aggravantes debito tempore ac loco congruo e corpore ejiciendo adsuescit, quasi actionum excretoriarum ordinatæ administrationi, ut hinc alias, optimæ quidem qualitatis substantias, sola tamen excessiva quantitate peccantes, ac œconomix vitali onerosas, (qualis est sanguis superfluus) tempore conveniente, locoque apto ex corpore proscribat. Salubriter initiantium Mensium idoneis subjectis merito annumeranda occurrunt illa, quæ tam in generando, quam excernendo sanguine peculiari quodam gaudent consuetudine, de quibus scilicet vulgare dicterium, ita sonans: Daß bey dergleichen Leuten alles zu Blut würde, effatur, quod enim consuetudo in diversis hæmorrhagiarum effectibus producendis eximia prædita sit potestate, neminem prudentiorum practicorum fugiet. Huc etiam refero ista, quæ per hæreditariam dispositionem præ cæteris huic consecratæ sunt salubritati: hæreditariam enim dispositionem satis potentem esse ad salubres initiantium Mensium successus & effectus causandos ipso experientix suffragio sole meridiano clarius apparet. His denique etiam, non exclusis aliis, adhuc accenseo illas fœminas, quæ a prima juventute sua perversam mendum methodum fugerunt & abhorrerunt: nam per talem œconomia vitalis sensibiliter alteratur, & ad diversas erroneas actiones producendas seducitur, eoque ipso ad menstruum negotium regulariter suscipiendum inepta redditur. Contrario autem modo res procedit in illis, quæ prædictis qualitatibus destitutæ non solum existunt; quin imo sæpius iisdem e diametro adversam degunt



degunt vitam, ut hac ratione fieri aliter haud possit, quam quod alienis his circumstantiis sinister quoque Mensium initiantium emergat effectus.

§. XVII.

Posteaquam vero de subjectis præ aliis in salubritatem hanc propensis verba quædam feci, placet nunc secundum ordinem in proæmio indigitatum, ipsam salutarium effectuum primordii Mensium generalem aggredi relationem: generalis igitur initii Mensium salubritas præcipue se se manifestat generalium causarum morbificarum sublatione, indeque provenientium morbosorum symptomatum extinctione: hinc videmus etiam, quod idem partim superfluum & onerosum sanguinem per congruas vias eliminando, ejusdemque dyscrasiam & vitiosam consistentiam emendando ac meliorando; partim quoque anomalias istius commotiones temperando ac compescendo plurimorum constituat præviorum morborum finem. Id circo initium Mensium non modo 1) tales molestias, quales puellæ sine singulari quidem sanitatis offensa ac dispendio experiuntur, ex quibus nihilominus tamen multum incommodi ac impedimenti in moralibus æque ac domesticis actionibus rite expediendis sentiunt; sed & 2) alias son-  
 ticas afflictiones, sanitatem earundem non parum labefactantes e corpore illarum proscribere, docemur. Priorum classẽ quod attinet, in omnes notum est, activioris de reliquo temperamenti scemellas in insolitum quendam animi torporem, segnitiam & aliqualem in somnum proclivitatem incidere, ut exinde adstantes perquam grave sanitatis periculum iisdem ominari audeant, quod etiam sequentibus verbis non raro exprimere solent: es stehe dergleichen Leuten eine gefährliche Krankheit bevor, oder, es hange ihnen etwas großes an; a quibustamen omnibus molestis hisce invasionibus pri-



mo menstruæ excretionis accessu statim liberatas & in pristinum animi vigorem se restitutas deprehendunt; sic earundem quædam gravativis sæpenumero totius corporis sensationibus, post prægressos mitissimos motus (quas non raro plenariæ virium jacturæ ac debilitationes excipiunt) afficiuntur, ut hinc non infrequenter exclamare cogantur: es wäre ihnen nicht anders, als ob man ihnen alle Glieder zerschlagen hätte; quibus autem perceptionibus adversis superveniens primordium Mensium optime finem imponit: nec paucæ harum inveniuntur, quæ frequentibus corporis peripheriæ angustatoriis opple- tionibus vexantur, facillimeque sanguinis ebullitioni- bus ac spumescentiis obnoxia sunt, quarum pariter re- motionem per primam Mensium eruptionem pro voto assequuntur: porro quoque nonnullæ puellarum copio- sis, eisque incommodis sudationibus vel ex toto corpo- re, vel ex peculiaribus ejusdem partibus, (ut pedibus, manibus, locis subalaribus, ac genitalibus) vel quovis anni, vel certo saltim ejus tempore, (ut vernali, autum- nali &c.) erumpentibus, non raro foetorem spargenti- bus & insignem in cute pruritum post se relinquentibus aggravantur, contra quas nihilominus tamen initians fluxus menstruus præsentaneum sæpe constituit auxili- um, id quod ante aliquot annos in puella decimum sex- tum ætatis annum agente annotare mihi ipsi in patria mea licuit, quippe quæ vernali tempore præ sudoribus talibus hircum quasi olebat, ut aliorum hominum con- suetudinem, ob abominabilem istum foetorem, tam per- tinaci perseverantem, continuatione per prædictum tem- poris spatium, fugere opus habuerit, & qui sudores nullo etiam debellari potuissent medicamentorum ge- nere, donec ipsum anno decimo octavo menstru- um prospere in eadem successerit negotium, quod omnem eorum fomitem e corpore miseræ nostræ secum



secum eduxit : præterea etiam vice plus simplici observandum occurrit, quod non exigua puellarum pars floridum & athleticum alias aspectum præ se ferentium luridam posthac larvam induat, & habitu corporis pallido, livido, tumidulo, frigido, maculis latis, flavescens, vel etiam atropurpureis (quarum priores die Leber-Flecken vulgus appellat) notato corripiatur; quamprimum vero purgationis menstruæ initium legitimum ingruit, omnia hæc adversa pathemata mox evanescere incipiunt: item, quando ex virginum cohorte quædam vertiginosis capitis temulentis affliguntur, ut ob harum præsentiam neque internorum neque externorum sensuum officium debito modo administrare possint; vel, si aliquæ ex harum classe pectoris quibusdam angustationibus, liberam aëris attractionem inhibentibus, extorquentur, quæ præcipue tunc temporis sensum earundem incurrunt, quando acclivia loca ascendere se accingunt; vel si quædam illarum frequentes abdominis inflationes, ac intestinorum volutationes patiuntur, vel etiam quædam appetitus dejectione & nauseabundis conatibus obrutas se profitentur; vel si in quibusdam ante primam Mensium eruptionem, præcedente nimirum aut spissitudine humorum, aut stricture partium, salubri huic excretioni obicem figente, transitoria quædam dolorifica pathemata, ut tenforia, strictoria, lancinatoria, distensoria, ardentia, pungentia in abdomine, regione inguinum ac lumborum, ut & in reliquis cum Vena Portæ connexis partibus se manifestant, quæ ut plurimum eo usque perdurant, donec prima vice menstruus effluat sanguis, cujus effluxione non modo hæc, sed & in antecedentibus indicata symptomata exacte finiuntur. Non secus res procedit in aliis, quæ in corporis extremitatibus molestum, formicantem, ac fremebundum percipiunt sen-



sum, ut hinc sequentes Medicorum auribus exponant querelas, quando in vernacula dicunt: es lauffe ihnen in diesem, oder jenem Gliede nicht anders, als ob Ameisen darinnen wären; quæ tamen ingrata & dolorosæ sensationes cum fluxu initiante menstruo sæpius minuuntur, uti idem ex propria annotatione asserere possum, dum haud ita pridem puella quædam nobilis profapiæ in patria mea sensu tali formicante ac fremebundo in pedibus tam vehementer divexabatur, Medicos ut consulere oportuerit illam, frustraneo tamen cum successu; cum autem præterlapso anni dimidio Mensium fons aperiebatur, hic iterum sua sponte derelinquebat afflictam; denique aliquando etiam accidit, ut puellæ de reliquo sanæ tempore nocturno vel somni inquietudine, vel terrificis ac horrendis defatigentur insomniis, ut exinde corporis marcor subsequatur; simul ac vero initium Mensium regulari & salubri suo successu appropinquat, singula hæc animum illarum deferunt, ut sic pristina iterum fruantur dormiendi integritate. Posteriorum autem quod concernit numerum morborum, sciendum omnino est, quod primarium in eo hæmorrhagiæ obtineant locum: ex medica nimirum observatione luculenter patet, corpus humanum actualibus sanguinis excretionibus non infrequenter ægerri-me affici solere. Nam licet quædam hæmorrhagiæ ratione finis nihil portendant mali; nihilominus tamen respectu sinistræ applicationis, tam quoad incongrua loca, quam quoad inadæquata tempora, & irregulares successus multas pariunt molestias, ut idem conspici-mus in hæmorrhagia narium, de qua in procæmio asserui, non parum illam in multis subjectis consulere sanitati, quando vero hæc incongruo prorumpit tempore, quo v. g. subjecta hanc patientia vel aliis negotiis implicata observantur, ut in horum expeditione haud exiguum inde



inde sentiant incommodi ac impeditenti, vel quando hæmorrhagia narium tali tempore subjecta sequioris sexus eruptione sua invadit, quali per ætatis rationem ob majorem proclivitatem in aliam hæmorrhagiarum congruarum speciem, menstruam scilicet, ad hujus successum indisposita aliququaliter existunt, tunc contingit, ut multas proruptione sæpe secum conjunctas habeat dolorosas sensationes. Quapropter si puellæ aliquando hæmorrhagiis talibus morborosis onerantur, non raro per initium Mensium ad pristinum sanitatis reducuntur vigorem. Præter ipsas autem hæmorrhagias ex posteriorum numero & molimina harum, ut congestiones, inflammationes, rhevmatismos, nonnullosque ita dictos catharrhales affectus, item diros illos spasmodicos ac convulsivos insultus corpus puellarum non leviter excruciantes, reliquasque motuum exaltatas administrationes, ut febres, aliosque motuum se-& excretoriorum excessus vel penitus sufflaminare, vel ad minimum mitigare prima menstrua eruptio assolet; Sicuti vero hæc ad excessiva motuum vitia consopienda præstans est auxilium; ita & pari modo in talibus morborosis afflictionibus, quales defectu motuum stipatæ, validum sat constituit adjumentum: hinc videmus, quando in puellis quibusdam plenariæ motuum amissiones occurrunt, quod eadem perfectam motuum resuscitationem per initiantem Mensium fluxum iterum recuperent; vel quando earundem quædam ex motus Tonici debilitatione, viscerum obstructionibus, in perfectas non raro indurationes vergentibus subjiciuntur, ut inde enormia pullulare soleant morbosa symptomata, quæ ut plurimum tam diu perdurant, donec ipse menstruus promanare incipiat fluxus, in quo omnia prædicta pathemata una cum causis suis afflictas deferendo ultimum quærunt terminum: nec non morbi serosi, ulcera manan-



manantia, cacocœthea haud parum ex eodem levaminis hauriunt. Tandem quoque morbis in initiante fluxu menstruo exitum quærentibus annumerari merito debent non paucæ moralium functionum læsiones, imo perfectæ confusiones ac perturbationes; interdum enim foemellæ maniacis, melancholicis, aliisque crudelibus ac rabidis immerse observantur furoribus, qui interdum in illud tempus perennant, quo menstrua excretio primas subit eruptionis vices; qua cum omnes ab iisdem gestatæ furibundæ actiones cessant, ut posthac tales pristinis iterum integritatis animi inclusæ cancellis secundum sanæ rationis normam degere valeant vitam.

§. XVIII.

Quo autem observationis hujus nervus eo magis eruatur, provolvor nunc ad specialiore[m] historicam hujus thematis explicationem, & ante omnia perpendere allaboro, quinam fonticorum morborum præ reliquis per initiantem Mensium fluxum facilioris sint remotionis. Quamvis plurimæ morbidarum afflictionum sub prædictis generibus comprehensarum per initium Mensium a tenero puellarum corpore arceri soleant; attamen quædam earundem præ aliis facilius per illud sanantur: hinc apparet, quod illi morbi, qui cum objecto menstruæ excretionis arctiorem ac proximior[m] sovent connexionem, longe expeditioris sint solutionis. Propterea etiam morbi sanguinei, ut hæmorrhagiæ, congestiones, inflammationes, febres sanguinæ &c. aliis non obstantibus circumstantiis facillime, simplicius serosi autem morbi, aliique tardius a primitiis solvantur mensium; ideoque nunc perlustrare placet, quænam ex hæmorrhagiarum genere salubritati huic præ cæteris obtemperant! Illos, qui ægrorum restitutioni insudant, latere non posse existimo, quod ali-  
quando



quando quadam subiecta menses nondum perpessa diversis hæmorrhagiarum affliguntur speciebus, quæ quidem ratione locorum, per quæ erumpunt, forte congruæ dicendæ, interim tamen ratione successus insignibus eadem exponunt periculis, quod sæpius annotare licet de hæmorrhagia narium, quæ quandoque singularibus capitis doloribus, venarum faciem perreptantium inflationibus concomitantibus, aliisque totius corporis molestis perceptionibus puellas quasdam invadit, prætereaque successu suo nimio vires earundem ita prostrernit, ut mortuorum instar Lipothymicis, imo Syncopticis sepultæ humo incumbant, recursibusque suis vel periodicis vel irregularibus tam diu sæviant, quamdiu menstrua delitescit excretio. Parili modo res constituta est cum vicariis ac anomalicis narium hæmorrhagiis, quæ ex vicinis nasi partibus, ut oculis, auribus aliisque faciei locis interdum erumpunt, quando ordinaria narium sanguinis stillicidia vel ob paulo provectiorem ætatis terminum, vel præviam suppressionem, vel alias propter causas ad plenariam deveniunt subsistentiam ac cessationem, aut saltim in impeditiorem delapsæ fuerunt successum: hinc accidit non raro præsentem sanguinis ubertate, ventilationem urgente, ut ex erronea methodo eandem prosequatur agens vitale, & cum semel pro sanguinis depletionem instituenda erroneam sibi hanc elegerit viam, usque eo tandem illam pro hoc scopo obtinendo satis idoneam retinet, dum meliorem sponte invenit, aut commodiorem per artem demonstratam acquirit; id quod etiam in puellis tunc temporis contingit, quando ordinariam prima vice incurrunt excretionem menstruam, uti idem innumerarum puellarum testimonio luculenter confirmari posset, quod etiam practicum multi ex diligentiori animadversione fecerunt, quorum

D

haud



haud exiguum *Dn. D. Præses in Lexico suo reali* observationum medicarum passim adduxit numerum. Ad morbos per initium Mensium sanabiles ex hæmorrhagiis pertinere sputum cruentum inquam, quod frequenter occurrere solet, multumque iisdem infert detrimenti, dum salivam ad concoquendos cibos maxime necessariam pro asservatione ac deglutitione inutilem plane reddit: hisporro annumeranda est hæmoptysis, vomitus cruentus ac mictus cruentus, quæ afflictiones morbidæ miserasæque interdum ante primam mensium promanationem corripiant virgunculas, iisque multum minantur periculi, ut sæpius juniorem amittere cogerentur vitam, nisi per initiantes Menses iisdem consuleretur, ac earundem graviter admodum labefactata sanitas iterum obfirmaretur, & erigeretur: nec non fluxus hæmorrhoidalis, quo itidem puellarum quædam non parum oneris persentiunt, referri huc meretur; siquidem eundem utplurimum sensus ardens, premens, aliaque in intestino recto obvia gravativa symptomata concomitantur, quæ sæpissime vel excessivus vel defectivus successus excipit, ex quo utroque statu magnis de novo rursus exponuntur miseriis. Quod autem hætenus de supra indicatis hæmorrhagiarum speciebus dixi, idem etiam valet de subordinatis earundem sanguinis excretionibus, quas puellæ ex diversis corporis partibus experiuntur, ut, e. g. ex mammis, (*conf. Amat. Lus Cent. 2. cur. 21. Paræus L. 23. c. 52. Franckenau Sat. Medic. p. 243.*) locis subalaribus, umbilico, regione inguinali, pedibus manibusque &c. *conf. Lexic. reale Dn. D. Præsidis*, id quod mihi ipsi dum temporis, quo manuductione fidelissima Practici cujusdam in patria mea celeberrimi *Dn. D. Donaueri* fruitus sum observare contigit in puella quadam rusticæ stirpis, ætatem XIX. annorum agente, quæ insignibus corripiebatur mammarum titillationibus,



nibus, ut easdem fere unguibus dilacerare coactam se viderit; cum autem tertio die matutino satis tempore lectum derelinquebat, singulari affligebatur tussiculosa commotione, istiusque titillatorix sensationis mira ad-  
auctione, quæ tam firmiter ad decimam usque meridia-  
nam horam continuabant, qua ex dextra mamillarum  
papilla singulari cum impetu sanguis profiliit, ut repente  
accedente animi deliquio lectum rursus petere illam o-  
portuerit; præterlapso triumseptimanarum spatio su-  
pra indicata Symptomata de novo recruderunt, & sic  
in vigesimum ætatis annum pristinam luserunt tragoedi-  
am, quo tandem prima superveniente Mensium eruptio-  
ne plenario cessarunt.

### §. XIX.

Perspecta itaque initii Mensium salubritate, quam  
in hæmorrhagiis removendis nobis ostendit, converto  
me nunc ad ulteriorem pensitationem ipsius, & per-  
scrutari suscipio, quanta eadem sit in moliminum harum  
extinctione. Quemadmodum hæmorrhagiarum haud  
exiguus in praxi medica occurrit numerus; ita etiam  
molimina earundem haud angustum in eadem implent  
spatium, ut numero priores propemodum superent;  
siquidem plura eorundem unicam ut plurimum respice-  
re solent hæmorrhagiam. Ast, quanquam ingens sit  
eorundem numerus; interim tamen idem nullam in se  
complectitur speciem, quæ ab initio Mensium haud re-  
moveri posset, ipsaque testatur experientia, quod tam  
illa hæmorrhagiarum molimina, quæ superiores excruci-  
ant corporis partes, quam ista, quæ inferiora, ac cum Ve-  
na Portæ consensum foventia loca & regiones ægre affici-  
unt, exoptatum in eodem adipiscantur exitum: hinc  
annotandum merito est, quod primitivæ Mensium non  
solum capitis dolorosis afflictionibus, ut cephalalgix  
sanguineæ & serosæ, iliaco-hæmatiticæ, apoplexiæ  
D 2 pro-



prodeunti, cephalææ, hemicranie, phrenitidi, ophthalmie, oculorum lippitudini, cataractæ, otalgie, aurium tinnitui & auditus gravitati ac surditati, odontalgie, affectibus soporosis, vertigini, coryzæ, Phlegmatorrhagiæ, gravedini, broncho diversisque capitis efflorescentiis, item parotidum inflammationibus, tonsillarum, aliarumque glandularum colli tumentibus inflationibus, nec non anginodis ejusdem angustationibus; sed & reliquis thoracis, abdominis inferiorumque extremitatum molestiis, cardialgie, phthiseos initiis, palpitationi cordis, rheumatismo, pleuritidi, asthmaticis diversæ speciei incommodis, tussi, in specie vero hypochondriacæ, malo hypochondriaco, hysterico, splenetico, fluxui hepatico, & initianti scirrho hepatis ac lienis, colicæ hæmorrhoidali, venarum cruralium varicosis intumescentiis, ac in earundem confiniis oborientibus inflammatoriis, vel erysipelaceis, vel phlegmonodis afflictionibus, prætereaque diversis præternaturalibus corporis quibusdam excrecentiis ac concrementis, ut polypo narium, cordis, aphthis aliisque his similibus spongiosis diversa corporis loca occupantibus, & externum corporis habitum non raro depravantibus propullulantibus protuberantiis optime aliquando medeantur, uti idem pariter variarum puellarum exemplo confirmari posset, quod tamen temporis penuria facere in præsentiarum interdicit, & unica nos contentos esse jussit observatione clinica, quam ipse ex præxi jam laudati viri *Dn. D. Donaueri* annotavi in virgine anno XVIII. proxima, bonæ educationi & laudabili vitæ generi adsueta, temperamenti phlegmatico-sanguinei menses nondum experta, ante annum tempus chlorosi laborabat, inappetentia, sequebatur lassitudo artuum & contabescencia, respiratio reddebatur laboriosa, anxio cum sono asthmatico, tandem accedebat œdo.



œdematosa tumefcentia pedum per furas ascendens, quæ, si major erat, circa pectus melius se habebat, & respiratio erat liberior; e contra, si minor eadem reddebatur, repellentia per remedia ab aniculis commendata exterius applicata: talibus itaque remotis, substitutis, præter calorem externum, transpirationem moderate promoventibus, tonum leniter roborantibus externis, & per interna, individualibus circumstantiis respondentia Mensium fluxum invitantia remedia per aliquot tempus usurpata, sic tandem proveniente fluxu menstruo communi, & in futurum continuante, eodem liberata est hæc persona a morbido suo affectu.

§. XX.

Cum in antecedentibus salubritatem initiantium Mensium in morbis congestionibus stipatis se se exerentem perlustravi, transitum nunc facio ad spasmos, ut inde penitus paulo inclarescat, quinam eorundem salubritati huic sint obnoxii. Multis enim spasminis frequenter sæpe obruitur puellarum cohors, & ipsa testatur experientia, quod iidem haud raro excipere solent in puellis prægressas congestiones: dum enim vitale agens levioribus motuum gradibus finem suum propositum impetrare nequit, auctioribus sæpe idem efficere conatur, & hinc spasmodicis stricturis adversum sibi objectum e corpore ejicere tam pertinaciter intendit, ut fere nullo ab irregulari hac methodo abigi possit remedio; quale quid præcipue quoque contingit in quibusdam sexus sequioris subjectis, quæ pari modo ut congestionibus; ita spasmodicis angustationibus exponuntur, ut hinc quædam earundem pleuriticis, quædam arthriticis veris & nothis, aliæ ischiadicis, podagricis, nephriticis simplicioribus, aliæ vero actualibus convulsivis motibus afflictæ medicum sibi expetere opus habeant auxilium, quod tamen ut plurimum tan-



ta haud est utilitatis, quantam quidem miseræ de eodem mente sibi conceperunt, & experiuntur potius non modo supra indicatorum morborum nihil levaminis; quin imo satis notabilem illorum exacerbationem illabuntur, quam indies accrescentem ad ultimum usque vitæ spiraculum retinerent, nisi menstruus rite initians fluxus miseras ex eadem eriperet, uti idem ex subnexo casu luce clarius conspiciendum est: opulentorum parentum filia, XIII. annos vivens, temperamenti Melancholico Sanguinei solitarium & sedentarium vitæ genus amans, ad iram proclivis, laudabilia usurpans alimenta, quoad potum vero in defectu peccans post 10. ætatis annum tam quoad caput cephalalgicis, hemicranicis, quam quoad pectus angustatoriis & in abdomine torminosis passionibus frequenter vexabatur, idque per aliquot præcipue dies, singulis mensibus successu temporis valde augebantur hæc pathemata, licet celeberrimæ famæ Medici consiliis & auxiliis nimis fere numerosis adstiterint, & tandem illis sociabantur convulsiones magis magisque conspicuæ, singulis noviluniorum periodis repetentes, quæ subinde postea extra dictum tempus, præcedentibus iræ exacerbationibus excitabantur: hinc & motibus convulsivis & reliquæ ægritudini opponebantur medicamenta, quæ convenire quidem, & malum imminuere; sed omnimode extirpare haud valebant, usque dum 15. annum superatum Mensium sponte inchoans fluxus omnium accusatorum symptomatum finem faciens infallibile dedit testimonium, quanta affinitate negotium Mensium dilatatorum cum hoc malo habuerit connexionem.

§. XXI.

Præter supra indicatas spasmodicas afflictiones reliqua quoque in auctioribus motibus consistentia pathemata, quibus puellarum quædam Menses nondum per-

pessæ



pestæ corripuntur, initio horum exstirpantur, ut, quando v.g. aliquæ fœmellarum frequentioribus spontaneis vomitionibus afficiuntur, *conferat. Dominic. Panerol. Roman. in Pentecost. obs. medic. XXII. p. 26. Pentec. I. de Mensibus per vomitum excretis post eruptionem legitimam ventriculum deferentibus*: quæ tunc temporis inprimis in conspectum prodire, & exacerbari observantur, quo alias ordinaria menstrua excretio prorumpere solet; vel quando aliquæ ex iisdem singularibus ardentibus sensationibus e dextro ventriculi latere e fundo in Oesophagum adscendentibus, quibus interdum singultuosæ diaphragmatis commotiones insequuntur, molestantur; vel si aliæ ex harum classe strictoriis, tensoriis, lancinatoriis in intestinorum tractu torminibus aggravantur; vel, si aliæ illarum periodicis quibusdam serosis aut sanguinis alvi fluxibus (quos prædicti intestinorum dolores plerumq; vel antecedunt, vel concomitantur) corripuntur. *conf. A. N. C. dec. 2. ann. 5. obs. 57. it. ann. 8. obs. 216.*

§. XXII.

Porro quandoque accidit, ut etiam virgunculæ tales febrilibus quibusdam commotionibus, perfectum sæpenumero typum servantibus subjiciantur, quæve suis recursibus ægrotantes tam quoad corpus, quam quoad vires ita depauperant, ac debilitant, ut debitis rite invigilare haud queant domesticis suis negotiis; id quod in specie dicendum de febribus illis languineis, ut Ephemera, Synocha simplici, febre inflammatoria, catharrali benigna &c.; quibus tamen omnibus per primam menstruam purgationem vice plus simplici optimam & præstantissimam afferri medelam, expertum habent miseræ.

§. XXIII.

Dum hætenus Mensium initiantium salubritatem in illis perlustravimus morbis, quorum præcipuum fundamentum



damentum motibus adauctis vitalibus inest; ita nunc eandem in animi morboſis afflictionibus, quippe quarum primarius ſons cum prioribus univocam propemodum agnoſcit cauſam, perſcrutari exordior. Nam uti puellæ ex irregulari & defectivo Menſium ſucceſſu aliquando furibundas producunt actionum moralium adminiſtrationes; ita etiam parili ratione tales, quibus quidem Menſium prima imminet eruptio, quæ ad debitum tamen ſucceſſum ob quorundam impedimentorum præſentiam haud pertingit, easdem læpius incidunt, cujus aſſerti veritatem obſervatorum teſtimonio evincere poſſem, qui haud ſemel de puellis maniacis, melancholicis, erotomaniacis, noctambulantibus &c. per initium Menſium plenariæ priſtinæ animi ſui libertati redditis injecerunt mentionem; inter quæ unicum tamen Foreſti allegaſſe ſufficiat, quod in ſcriptorum ſuorum diverſis locis nobis offert.

§. XXIV.

Sequitur jam in ordine ſalubritas initii Menſium reſpectu morborum, defectum motuum innixorum conſideranda, quæ in hiſce morbis tanta pariter eſt, quantam quidem hanc in antecedentium morborum genere extulimus; ſiquidem ſcœminarum nonnullæ Lipothymicis, Syncopticis, Pareticis, Paralyticis, hemiplectodeis, catarrho ſuffocativo nonnunquam decumbunt; attamen hæc omnia eo tempore, quo menſtrua excretio prima vice proſanat, ægrotantes deferunt, eoque concedunt, quo ordinario eadem iterum uti poſſint partium motu.

§. XXV.

Reſtat denique nunc ponderandum, an initii Menſium utilitas quoque ad ſeri vitia ſananda quadret? Ut enim plurimæ chronicorum morborum ſpecies admodum



dum sint refractariæ indolis, ut difficillime per artem penitus tollantur; interim tamen plurimis initii Mensium salubris efficacia nonnunquam satis validam affert opem: hinc videmus, quod quandoque puellarum quædam cacochymicum, cachecticum, leucophlegmaticum, œdematosum, imo ipsum anasarcodem, chloroticum, scorbuticum corporis habitum præ se ferentes multum per initiantem Mensium fluxum acquirant salutis, ut per eundem quandoque ad summum iterum redigantur sanitatis fastigium, quod quibusdam puellarum exemplis corroborari posset, si charta idem concederet; ex quibus tamen unicum hoc annotare libet, quod ante quatuor annorum spatium in patria subvenit in foemella XI. annos nata, cacochymici corporis habitus, pallidi aspectus, laborabat inappetentia, anxiasque circa præcordia sentiebat pressiones, post assumpta præsertim gravissimas, cor vehementer pulsabat, ut singuli pulsus visu notabiliter observarentur, in dextro præcipue pectoris latere, & in collo, quæ ipsa pulsus vehementia sensibilibiter augebatur qualibet corporis commotione licet lenissima illa fuerit, subque his circumstantiis viribus valdopere depauperata est, nocturna quies & somnus interceptus &c. imo ipsum corporis incrementum, quod hisce annis bonos alias facere solet progressus, impeditum, & plane in decrementum magis mutatum est; varia equidem medicamenta passim commendata a parentibus sollicitè adhibebantur, at absque ullo fructu, donec sæpius jam laudati Practici implorata auxilia, per DEI gratiam voto respondebant: ultra enim semestris temporis spatium optime inde habuit; sed postmodum eo frequentius recurrere dicta pathemata, quæ omnimode haud cessare, usque dum initio Mensium viam parantia medicamina aliquandiu in usum vocabantur, & ordinarius eorundem fluxus ex lege artis instruebatur,

E

palli-



passiones hinc omnino desiere, quæ parentibus aliisque maxime ominosæ & periculosæ videbantur, & hac ratione reliquis æque hujus generis affectibus, ut scabiosis, atrophicis, ictericis corporis depravationibus, exoptatissimum sæpe numero constituit solatium.

§. XXVI.

Cum itaque tam generaliter quam spacialiter morborum per initium Mensium sanabilium conspectum historicum exhibuerim; converto me nunc ad rationes ac causalem deductionem tradendam, quo eo magis inclarescat, quod tam experientia quam ratione sit firmatum assertum nostrum: *initium Mensium finem esse morborum*, & cum in antecedentibus illum servavi ordinem, ut primo de hæmorrhagiis, postmodum de congestionibus, & sic porro quædam in medium protuli; ita etiam in hac ætiologica tractatione eodem progredi modo consultum duxi.

§. XXVII.

Hæmorrhagarum igitur quod concernit classẽ, sciendum omnino de iisdem est, quod primaria earundem causa inimica sit Naturæ Sanguinis ubertas, quam eadem ex diversis concurrentibus tam externis, quam internis circumstantiis per varia corporis loca eliminare, & sic ab onere hocce liberare contendit. Quemadmodum vero hæmorrhagiæ tales multiplicibus artificialibus adminiculis onerosam sanguinis plenitudinem imminuentibus (quorum optimum est actualis ejusdem subtrahio) extinguï valent, illarumque recursus præscindi potest; sic idem quoque per Menses regulariter initiantes obtinetur finis, & hæmorrhagiæ illæ molestæ vel ex superioribus vel ex inferioribus corporis partibus succedentes, longe expeditius sufflaminantur, quoniam non modo per illas infensa hæc sanguinis ubertas e loco pro excretionẽ hac satis idoneo ejicitur; prætereaque causa hæmor-



hæmorrhagiarum activa loco huic excretorio naturali, ex naturali ordine adsuescit, & ex hac consuetudine priora loca iterum derelinquit, & cum de reliquo tali tempore singularis in puellarum corpore motuum alteratio, variorumque organorum mutatio animadvertitur; illa mediante quoque aliorum minus congruorum locorum desertio mirum in modum acceleratur, & sic recursus talis hæmorrhagiarum præoccupatur.

§. XXVIII.

In prægressa historica relatione verba in simul quædam feci, de utilitate initii Mensium in congestionum genere eradicando conspicua, idemque rationi maxime consentaneum esse, ex subsequenter liquabit: quod si enim earundem originem accuratius paululum subtrutinam vocemus, tunc eandem in massæ sanguineæ anomalia commotione latentem deprehendimus, qualem vitale agens nulla alia ex ratione instituit, quam ut sinceri sanguinis eliminationem perpetret, quam vero ex diversarum circumstantiarum præsentia pro voto assequi nequit, ut hinc necesse habeat congestiones humorum ad alias corporis dirigere partes, ibidemque ejusdem exonerationem urgere, quibus hæmorrhagicis conatibus tam diu sæpe pertinacissime insistit, donec aliquando scopum suum tam sollicitè desideratum, impetraverit, quo denique omnia hæc molimina hæmorrhagica acquiescunt, & tranquillantur; id quod commodissime per primam menstruam eruptionem supervenientem perficitur, quippe qua omnis in corpore puellarum subortus sanguinis hæmorrhagiam actualem respiciens affluxus intercipitur, atque contemperatur.

§. XXIX.

Eadem ratione initium Mensium puellarum quarundam inflammatorios prægressos morbos ad feliciorem disponit exitum. Nam dum sanguinem superflu-



um tanquam singulare actus hujus discussorii impedimentum e medio tollit, inflammationis citiorem resolutionem promovet, dum vero hostem œconomix vitalis sæpius jam jam indicatum, sanguinis superfluum copiam puto, ex confiniis ejusdem proscribit, atque expellit, illius insimul resultus infringit.

§. XXX.

Non autem solis his morbidis afflictionibus utilitas primordii Mensium propria existit; verum etiam eandem toti spasmorum generi communem ex rationis lumine ad judicandam esse, censeo: siquidem ipsam eorum causam, superfluum scilicet sanguinis copiam, ejusque vitiosam consistentiam suffocat, ac demeliorat, eoque expedit, quo horrendæ illæ motuum exacerbationes consopiantur, ut sic sublata causa effectus quoque tollatur. Æqualem fere initii Mensium salubritatis gradum in reliquis auctiori motuum administratione consistentibus afflictionibus annotavi; multæ enim puellarum vehementi sæpe vomitione, soda, singultu, aliisque in hypochondriis ac intestinorum tractu se se exferentibus strictoriis, tensoriis, punctoriis, lancinatoriis doloribus, (quos aliquando actuales serosi alvi fluxus vel antecedunt, vel comitantur) excruciantur, quo frequentissime non nisi nuda molimina plenariam sanguinis eruptionem in ventriculum, aut in ipsam intestinorum cavitatem effusionem minitantiæ cum prima vice prorumpentibus Mensibus ultimum hac ex ratione subeunt continuationis terminum, quoniam initium sanguineæ hujus excretionis principii vitalis intentioni affatim satisfacit.

§. XXXI.

Pari passu cum Febribus præcipue sanguineis, ut Ephemera, Synocha &c. res constituta est, quæ a Natura idcirco instituuntur, quæ plethorica corporis constitu-



stitutio per imminutionem a nocendi sua potentia arceatur, quando autem huic commodior subministratur per Mensium initium via, actus febriles illos reiterare prorsus abstinet.

§. XXXII.

His morbis finitima sunt animi morbosa pathemata, de quibus in antecedentibus asserui, quod etiam illorum morborum censum incurrant, qui primitiis Mensium, ni plane suffocentur, notabiliter tamen mitigantur: quo autem & hujus phænomeni ratio innotescat, annotandum est, quod triplici ratione idem perpetretur; siquidem tales morbi ex triplici communiter progerminant fonte, quorum alterum superflua humorum copia, alterum vero vitiosa eorundem consistentia, tertium irregularis motuum administratio constituit: cum vero initium Mensium ea ratione, qua superfluum sanguinem imminuit, eoque spissescentiam corrigit, ac incarcerationes subnatas dissolvit, motuumque vitalium tergiversantium alterationem prolicit, menti puellarum insanæ pristinum iterum sanæ rationis reddit usum.

§. XXXIII.

Allegandæ jam veniunt causæ, propter quas motuum defectiva vitia eidem salubritati dicata statumina, quæ cum prioribus in unum collimant scopum; sicuti enim ad hos quoque affectus curandos sanguinis depletio, motuumque alteratio imprimis vero resuscitatio requiritur, quæ duplicia summe necessaria requisita, optime Mensium subministrant primitio.

§. XXXIV.

Agmen denique in causali hac relatione morbi serosi claudunt, de quibus sciendum ante omnia est, quod difficilior longe istis, quorum in superioribus mentio facta, per salubrem hunc fluxum initianter auferuntur: illis enim non tam vitiosa quanti-



tas & sola consistentia; sed qualitas potius alterata culpanda occurrit, & cum per initium Mensium positiva depravatæ istius qualitatis emendatio ex amissim haud speranda sit; ita plenaria multo minus horum morborum extirpatio expectanda; interim tamen, quando sub eorum præsentia Mensium initians fluxus se rite sistit, multum in eosdem redundat ex illo levaminis: nam per eundem a sero pessundatæ massæ sanguineæ aliquo modo acceleratur correctio, ejusdemque per partes poroso-cibrosas promovetur progressio, se- & excretionum quoque ordinatus facilitatur successus, ut hinc humores puriores atque fluidiores fiant, quo tandem medicis adhibitis auxiliis eo citius debellantur.

§. XXXV.

Antequam tractationi huic colophonem imponam, mearum esse partium reminiscor adhuc indicare, quomodo salubris hujus excretionis initiantis successus tam per remotionem huic remotionem ponentium obstaculorum, quam per positivam promotionem allevari, ac exinde emicandi utilitate, anxie eandem efflagitantes puellæ eo citius ex voluntate frui queant.

§. XXXVI.

Quapropter nunc ad obstacula prius depingenda calamum admoveo; quæ in positiva & privativa commode dispescentur.

§. XXXVII.

Quorum inter priora primarium occupat locum, defectus virium abigendi, humorum congestiones versus uterum dirigendi, eosque ibidem expellendi: qui scopus præcipue in valetudinariis valdopere exhaustis, extenuatis aut phlegmaticis, in quibus ad omnes actus iners Natura est, occurrit annotandus. Secundarium autem erronea motuum applicatio sibi vendicat locum, quando scilicet commotiones menstruum primam excretionem respicientes aliorum deflectunt, & anomalia hac administratione causantur, quo expectatum Mensium initium recte succedere nequeat.

§. XXXVIII.

Ex privativorum classe in frontispicio quasi collocata est famosa illa depravata humorum excernendorum consistentia atque crasis,



crasis, eorundemque insufficiens quantitas. Alterum e contrario partium sive viarum, per quas humores transprimendi nimia constituit strictura, quæ impedit, quo minus humores penetrare per easdem valeant. Tertium, idemque privativorum obstaculorum ultimum est illarum obstipatio, ab extrinseca ut plurimum pendens causa, quam vel mola, vel consolidatio post ulcerationes, variæ excrescentiæ vel uteri cervicem & orificium, vel vaginam ejus obdurantes suppeditat.

§. XXXIX.

Indigitatis hac ratione obstaculis initio Mensium salubri obicem figentibus, remotio nunc eorundem indicanda venit, quæ triplici maxime instituitur methodo pharmaceutica nempe diætetica & chirurgica.

§. XL.

Priorum ergo positivorum obstaculorum ablationi adæquata ex foro potissimum pharmaceutico ac diætetico petita extant remedia; eorundemque primum excitationem motuum, ultimum debitam horum directionem, ac in ordinariam viam reductionem, tam invitatione derivatoria, quam cohibitione repulsoria ab illo loco, ad quem in detrimentum hujus excretionis directi perpetrandum exigit.

§. XLI.

Priori indicationi, motuum resuscitationem pro fundamento habenti, remedia nervina, balsamica humorum massam blando suo sulphure leniter commoventia, eoque nervis robur adaugentia, ut herbæ sic dictæ nervinæ, cephalicæ, uterinæ &c. satisfaciunt: pro ultimo autem scopo, ordinatam motuum directionem concernente adimplendo optima fons chirurgicus objicit auxilia, & consistunt præcipue in VSione & Scarificatione inferiorum partium circa eminentiores Lunæ Phases administrata, frictiones quoque & diversa balnea tunc temporis instituenda, quo apparatus quidam ad negotium Mensium exsurgunt; porro pediluvia, stimulo præsertim salino acuata, remedia blande laxantia, fofus, & suffimigia &c. hic non incommode adhibentur.

§. XLII.



§ XLII.

Privativorum nunc sequitur subjugatio, & tam illorum, quæ humores attingunt, quam quæ in viis sese ostendunt: inter priora ante omnia humorum spissitudo, vitiosa crasis ac insufficiens quantitas refertur, quem in finem partim attenuantia, & humorum massæ debitam iterum fluiditatem conciliantia; partim solventia ac ejusdem depurationem promoventia; partim nutritia, & humorum massam adaugentia profunt. Reliqua adhuc privativorum obstaculorum, quorum alterum in viarum strictura, alterum in extrinseca earundem obstipatione hæret, medicis nunc quoque e medio tollenda sunt auxiliis: priorem quoad respectum, stricturam talem relaxantia ac demulcentia tam externe quam interne præscribenda sunt, & quidem interne temperantia, cinnabarina, Nitrosa ac leniora anodyna, vel Ess. temperantes ac leniores sedativæ, emulsiones ex sem. & aquis demulcentibus paratæ, aliaque his similia medicamina; ad externa autem infusus ex herbis & rad. emollientibus compositi, pessaria ex ejusmodi speciebus collecta, injectiones per metrenchytam, vel denique Glauberi clyisma uterinum vaporosum &c. pertinent. Obstipationi denique illarum gratificandi chirurgica imprimis adminicula adhibenda veniunt, quibus illa objecta hanc proritantia auferuntur: cæterum tali in molæ præsentia & interna quædam pellentia circumspecte ac prudenter propinanda sunt, quibus merito annumerandæ pil. Balsam. Stahl. & Becher.

§. XLIII.

Præstitis igitur in Proœmio exhibitis promissis nihil amplius addendum esse arbitror, quam quo Numen Divinum submississimis compellem precibus, ut in futuris practicis conatibus, sicuti hucusque a latere mihi fuit, in posterum assistere, eosque in sui ipsius gloriam proximique salutem dirigere velit.

